

I. DISPOSICIÓN XERAIS

MINISTERIO DA PRESIDENCIA

5762 *Real decreto 391/2011, do 18 de marzo, polo que se modifica o Estatuto do Organismo Autónomo Programas Educativos Europeos, aprobado polo Real decreto 903/2007, do 6 de xullo.*

A Decisión n.º 1720/2006/CE do Parlamento Europeo e do Consello, do 15 de novembro de 2006, pola que se establece un programa de acción no ámbito da aprendizaxe permanente da Unión Europea, establece un marco xurídico e organizativo ao cal se deben adaptar as actuacións comprendidas no mencionado programa, para o período 2007-2013.

Co fin de cumprir os requirimentos establecidos na citada decisión para os Estados membros da Unión Europea, a Lei 42/2006, do 28 de decembro, de orzamentos xerais do Estado para o ano 2007, creou na súa disposición adicional cuadraxésimo sexta o Organismo Autónomo «Programas Educativos Europeos», para a execución dos créditos orzamentarios que poidan resultar afectados pola xestión coordinada, a escala nacional, da realización das accións do citado programa da Unión Europea, así como para o desenvolvemento de todas as demais actividades necesarias para a dita xestión, e establece no seu número oito que o Goberno, mediante real decreto, poderá modificar os fins e a adscrición do organismo, así como a designación da autoridade nacional. O Real decreto 903/2007, do 6 de xullo, aprobou o Estatuto do Organismo Autónomo Programas Educativos Europeos.

A modificación que acomete este real decreto persegue varios obxectivos. Por un lado, adecuar o Estatuto do Organismo Autónomo Programas Educativos Europeos á nova organización administrativa configurada polo Real decreto 189/2011, do 18 de febreiro, polo que se desenvolve a estrutura orgánica básica do Ministerio de Educación e se modifica o Real decreto 1366/2010, do 29 de outubro, polo que se aproba a estrutura orgánica básica dos departamentos ministeriais, para o cal se actualiza a composición do Consello Reitor.

Por outra parte, amplíase a representación das comunidades autónomas no Consello Reitor, incorporando un novo representante das comunidades autónomas, nomeado pola Conferencia Sectorial de Educación. Deste modo, serán catro os membros do Consello Reitor designados por proposta das comunidades autónomas.

Finalmente, o real decreto pretende mellorar a estrutura de control interno do organismo, co obxecto de cumprir de forma máis eficaz cos requirimentos da Comisión Europea e da autoridade nacional, mediante a modificación do Comité de Control, que pasa a denominarse Comité de Coordinación e Control Interno e reforza considerablemente as súas funcións.

En consecuencia, por iniciativa do ministro de Educación e por proposta conxunta da ministra de Economía e Facenda e o ministro de Política Territorial e Administración Pública, de acordo co Consello de Estado e logo de deliberación do Consello de Ministros na súa reunión do día 18 de marzo de 2011,

DISPOÑO:

Artigo único. *Modificación do Estatuto do Organismo Autónomo «Programas Educativos Europeos».*

O Estatuto do Organismo Autónomo «Programas Educativos Europeos», aprobado polo Real decreto 903/2007, do 6 de xullo, modifícase nos seguintes termos:

Un. O artigo 1 queda redactado da seguinte maneira:

«Artigo 1. *Natureza xurídica, adscrición e fins.*

1. O Organismo Autónomo «Programas Educativos Europeos» (OAPEE) é un organismo autónomo dos regulados no artigo 43.1.a) da Lei 6/1997, do 14 de abril, de organización e funcionamento da Administración xeral do Estado, adscrito ao Ministerio de Educación a través da Dirección Xeral de Atención, Participación e Empregabilidade de Estudiantes Universitarios.

2. O organismo encargarase da execución dos créditos orzamentarios afectados pola xestión coordinada, a escala nacional, da realización das accións do «Programa de acción no ámbito da aprendizaxe permanente», da Unión Europea, así como para o desenvolvemento de todas as demais actividades necesarias para a dita xestión, conforme o establecido no número 1 da disposición adicional cuadraxésimo sexta da Lei 42/2006, do 28 de decembro, de orzamentos xerais do Estado para o ano 2007.

Esta xestión realizarase sen prexuízo das competencias que, en materia de fondos europeos, poidan corresponder a outros centros ou departamentos.

3. O Organismo Autónomo «Programas Educativos Europeos» ten personalidade xurídica pública diferenciada, patrimonio e tesouraría propios, así como autonomía de xestión e plena capacidade de obrar e, dentro da súa esfera de competencia, correspóndenlle as potestades administrativas precisas para o cumprimento dos seus fins, nos termos establecidos neste estatuto, salvo a potestade expropiatoria.»

Dous. O artigo 2 queda redactado da seguinte maneira:

«Artigo 2. *Réxime xurídico.*

1. O organismo rexerese polas disposicións contidas na disposición adicional cuadraxésimo sexta da Lei 42/2006, do 28 de decembro, de orzamentos xerais do Estado para o ano 2007, e polo presente estatuto, en canto non se contradigan coa normativa comunitaria; pola Lei 6/1997, do 14 de abril, de organización e funcionamento da Administración xeral do Estado; pola Lei 30/1992, do 26 de novembro, de réxime xurídico das administracións públicas e do procedemento administrativo común; pola Lei 47/2003, do 26 de novembro, xeral orzamentaria; pola Lei 30/2007, do 30 de outubro, de contratos do sector público; pola Lei 33/2003, do 3 de novembro, do patrimonio das administracións públicas; así como polas normas que desenvolven as disposicións citadas e por aquelas outras que resulten de aplicación. Son de aplicación, para os efectos da xestión orzamentaria do organismo autónomo, o artigo 54, número 2, letra c) do Regulamento (CE EURATOM) n.º 1605/2002 do Consello e o artigo do Regulamento (CE EURATOM) n.º 2342/2202 da Comisión.

2. Correspóndelle ao Ministerio de Educación, a través da Dirección Xeral de Atención, Participación e Empregabilidade de Estudiantes Universitarios, o control de eficacia a que se refire o artigo 51 da Lei 6/1997, do 14 de abril, de organización e funcionamento da Administración xeral do Estado, sen prexuízo dos restantes controis establecidos na normativa reguladora a que se fixo referencia no número anterior e as funcións que corresponden á autoridade nacional.»

Tres. O artigo 4 queda redactado da seguinte maneira:

«Artigo 4. *Órganos de goberno.*

Os órganos de goberno do organismo autónomo son os seguintes:

1.º Órganos colexiados:

- a) O Consello Reitor.
- b) O Comité de Coordinación e Control Interno.

2.º Órganos unipersoais:

- a) O presidente.
- b) O vicepresidente.
- c) O director.»

Catro. O artigo 5 queda redactado da seguinte maneira:

«Artigo 5. O Consello Reitor.

1. O Consello Reitor estará integrado polos seguintes membros:

- a) O presidente, que será o secretario xeral de Universidades.
- b) O vicepresidente, que será o director xeral de Formación Profesional.
- c) Os seguintes vogais:

O director xeral de Política Universitaria.

O director xeral de Atención, Participación e Empregabilidade de Estudantes Universitarios.

O director xeral de Avaliación e Cooperación Territorial.

O director do Gabinete do ministro de Educación.

O secretario xeral técnico do Ministerio de Educación.

Un representante designado polo Consello Escolar do Estado.

Un representante do Ministerio de Traballo e Inmigración, con rango de director xeral, elixido polo titular do citado departamento.

Un representante do Ministerio de Asuntos Exteriores e de Cooperación, con rango de director xeral, elixido polo titular do citado departamento.

Un reitor de universidade, elixido polo Consello de Universidades.

Un representante das comunidades autónomas con rango de director xeral, designado pola Conferencia Xeral de Política Universitaria.

Un representante das comunidades autónomas con rango de director xeral, designado pola Conferencia Sectorial de Educación.

Dous representantes designados polas comunidades autónomas, con rango de director xeral, ás cales lles corresponda a representación no ano en curso no Consello de Ministros de Educación e Formación da Unión Europea.

d) O director do Organismo Autónomo Programas Educativos Europeos.

e) O secretario, que será un funcionario do organismo e actuará con voz pero sen voto.

2. O Consello Reitor rexerese polo disposto neste estatuto e polo establecido no título II, capítulo II, da Lei 30/1992, do 26 de novembro, de réxime xurídico das administracións públicas e do procedemento administrativo común, e no capítulo IV, título II, da Lei 6/1997, do 14 de abril, de organización e funcionamento da Administración xeral do Estado.

3. O Consello Reitor, que será convocado polo seu presidente, reunirse en sesión ordinaria polo menos dúas veces ao ano e, en sesión extraordinaria, cando o xulgue necesario o presidente ou por petición da maioría dos seus membros.

Os acordos adoptaranse por maioría dos asistentes e, en caso de empate, dirimirá o voto do presidente.

4. O presidente poderá convocar ás reunións do Consello Reitor, cando o considere conveniente, persoas alleas ao organismo en calidade de asesores, pola súa especial relevancia nos temas que se vaian tratar, con voz pero sen voto.»

Cinco. A alínea e) do artigo 6 queda redactada da seguinte maneira:

«e) Aprobar, previamente á súa remisión á autoridade nacional, o informe anual solicitado pola Comisión Europea, coa documentación anexa que lle

corresponda, e garantir, ante a citada autoridade nacional, a fiabilidade dos sistemas financeiros e dos procedementos de xestión do propio organismo autónomo en canto axencia nacional, así como a probidade das contas presentadas.»

Seis. O artigo 7 queda redactado da seguinte maneira:

«Artigo 7. *O Comité de Coordinación e Control Interno.*

1. A presidencia do Comité de Coordinación e Control Interno corresponderalle ao director xeral de Atención, Participación e Empregabilidade de Estudantes Universitarios, e estará integrado polos seguintes membros:

- a) Un representante da Dirección Xeral de Política Universitaria.
- b) Un representante da Dirección Xeral de Avaliación e Cooperación Territorial.
- c) Un representante da Dirección Xeral de Formación Profesional.
- d) Un representante do Gabinete do ministro.
- e) Un representante do Organismo Autónomo Programas Educativos Europeos.

Os membros deste comité terán rango mínimo de subdirector xeral ou asimilado e serán designados polo presidente do Organismo Autónomo Programas Educativos Europeos, por proposta do titular do órgano representado.

2. Ás reunións poderán asistir, logo de convocatoria do presidente, aqueloutras persoas que, se for o caso, se consideren necesarias para o adecuado exercicio das súas funcións.

3. Corresponden ao Comité de Coordinación e Control Interno as seguintes funcións:

- a) Coñecer o plan de traballo do organismo.
- b) Coñecer e analizar os resultados das auditorías que se efectúen sobre o organismo e, se for o caso, propor as estratexias de corrección necesarias.
- c) Coñecer os resultados das accións de control que efectúen o Tribunal de Contas e a Intervención Xeral da Administración do Estado e, de ser o caso, propor as estratexias de corrección necesarias.
- d) Coordinar a relación entre as diferentes unidades do Ministerio de Educación e o organismo autónomo.
- e) Coñecer o anteproxecto de orzamento do organismo e a súa execución orzamentaria.
- f) Informar o Consello Reitor das actividades realizadas polo propio Comité de Coordinación e Control Interno, e a autoridade nacional cando sexa requirido por esta.
- g) Exercer cantas outras funcións lle encomende o Consello Reitor do organismo ou o seu presidente.

4. O Comité de Coordinación e Control Interno reunirase as veces que determine o seu presidente e, polo menos, cantas veces estableza o Consello Reitor do organismo.»

Sete. O artigo 10 queda redactado da seguinte maneira:

«Artigo 10. *O vicepresidente.*

1. A vicepresidencia do organismo corresponde ao director xeral de Formación Profesional:

2. Serán atribucións do vicepresidente:

- a) Substituír o presidente nos casos de ausencia, vacante, enfermidade ou calquera outra causa legal.
- b) Desempeñar as funcións que lle delegue o presidente ou o Consello Reitor.»

Oito. O artigo 11 queda redactado da seguinte maneira:

«Artigo 11. O *director*.

1. O director do Organismo Autónomo Programas Educativos Europeos terá nivel orgánico de subdirector xeral. Será nomeado polo ministro de Educación, por proposta conxunta do secretario xeral de Universidades e do secretario de Estado de Educación e Formación Profesional, de acordo co disposto no artigo 19 da Lei 6/1997, do 14 de abril, de organización e funcionamento da Administración xeral do Estado.

2. Serán as súas funcións:

- a) Dirixir as actuacións do organismo de acordo coas directrices que estableza o Consello Reitor e o seu presidente, así como as da Comisión Europea, e realizar as convocatorias correspondentes ás distintas actuacións contidas no programa de acción no ámbito da aprendizaxe permanente.
- b) Elaborar o anteproxecto de orzamento que deberá ser sometido ao Consello Reitor.
- c) Elaborar o plan de traballo que se someterá ao Consello Reitor para a súa aprobación.
- d) Dirixir, coordinar, avaliar e supervisar todos os servizos do organismo, así como exercer a xefatura superior daquel.
- e) Establecer, desenvolver e aplicar procedementos de control interno do funcionamento do organismo autónomo.
- f) Establecer, desenvolver e aplicar procedementos para asegurar e garantir a regularidade e fiabilidade das contas relativas aos fondos europeos que xestiona, así como acerca da súa legalidade, de modo que quede garantido que todas as transaccións efectuadas respectaron a normativa da Unión Europea.
- g) Subscribir os contratos e convenios financeiros coa Comisión Europea, así como cos beneficiarios das subvencións.
- h) Elaborar o informe anual do organismo que se elevará ao Consello Reitor.
- i) Presentar a información e documentos do organismo que lle sexan requiridos polo Consello Reitor, o Comité de Coordinación e Control Interno e a autoridade nacional.
- j) As demais funcións que lle sexan delegadas polo Consello Reitor, o presidente ou o Comité de Coordinación e Control Interno.»

Nove. O artigo 14 queda redactado da seguinte maneira:

«Artigo 14. *Comités de programa*.

1. Para a adecuada realización dos programas, así como para os novos programas que poidan xurdir, créanse os seguintes comités:

a) O Comité Erasmus, que estará presidido polo subdirector xeral de Atención ao Estudante, Orientación e Inserción Profesional e integrado por un representante da Dirección Xeral de Política Universitaria e catro representantes designados por proposta do Consello de Universidades, así como con dous representantes das comunidades autónomas.

O Comité Erasmus terá funcións de asesoramento e asistencia ao Consello Reitor, ao Comité de Coordinación e Control Interno e á correspondente división, e estará encargado de establecer as liñas de acción no marco dos obxectivos, plans de acción e prioridades nacionais definidos polo Consello Reitor.

b) O Comité Leonardo da Vinci estará presidido polo subdirector xeral de Orientación e Formación Profesional e integrado por un representante de cada unha das organizacións sindicais e empresariais máis representativas, un representante do Ministerio de Traballo e Inmigración, así como dous representantes das comunidades autónomas.

O Comité Leonardo terá funcións de asesoramento e asistencia ao Consello Reitor, ao Comité de Coordinación e Control Interno e á correspondente división, e establecerá os mecanismos de cooperación que permitan unha mellor realización das accións do programa.

c) O Comité Comenius e Grundtvig estará presidido polo subdirector xeral de Cooperación Territorial e integrado por un representante da Subdirección Xeral de Aprendizaxe ao Longo da Vida e por catro representantes das comunidades autónomas, designados por proposta da Conferencia Sectorial de Educación.

O Comité Comenius e Grundtvig terá funcións de asesoramento e asistencia ao Consello Reitor, ao Comité de Coordinación e Control Interno e á correspondente división, e establecerá os mecanismos de cooperación que permitan unha mellor realización das accións do programa.

2. Os membros dos comités serán formalmente designados mediante resolución do presidente do organismo autónomo.»

Disposición derradeira única. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 18 de marzo de 2011.

JUAN CARLOS R.

O ministro da Presidencia,
RAMÓN JÁUREGUI ATONDO